

摘藻堂四庫全書薈要

集部

欽定四庫全書蒼要卷一萬八千九百二十四

集部

御定佩文齋詠物詩選卷三百二

棗類

五言古

棗

後秦

趙整

北園有一樹布葉垂重陰外雖多棘刺內實有赤心

賦棗

梁

簡文帝

浮華齊水麗垂彩鄭都可白英紛靡靡紫實標離離風

搖羊角樹日映雞心枝
設城踰石蜜蓬岳表仙儀已聞
安邑美永茂玉門垂

棗下何纂纂

簡文帝

垂花臨碧澗結翠依丹巘
非直入遊宮兼期植靈苑
落日芳春暮游人歌吹晚
弱刺引羅衣朱實凌還幘
且歡洛浦詞無羨安期遠

杏園中棗樹

唐白居易

人言百果中惟棗凡且鄙
皮皴似龜手葉小如鼠耳
胡

為不自知生花此園裏豈宜遇攀翫幸免遭傷毀二月
曲江頭雜英紅旖旎棗亦在其間如嫫對西子東風不
擇木吹苞長未已眼看欲合抱得盡生生理寄言遊春
客乞君一迴視君愛繞指柔從君憐柳杞君求悅目艷
不敢爭桃李君若作大車輪軸材須此

賦棗

宋
王安石

種桃昔所傳種棗子所欲在實為美果論材為良木餘
甘入鄰家尚得饒婦逐況予秋盤中快噉取饜足風包

墮朱繒日顙皺紅玉贄享古已然幽詩自宜錄紆懷青
齊間萬樹蔭平陸誰云食之昏匿志乃成俗廣庭觴聖
壽以此參肴藪願比赤心投皇明儻予燭

棗亭春晚

明揭軌

昨日花始開今日花已滿倚樹聽嚶嚶折花歌纂纂
人浩無期青春忽已晚寫盡錦箋長燒殘紅燭短日夕
望江南綵雲天際遠

棗

明吳寬

荒園乏佳果棗樹八九株纂纂爭結實大率如琲珠此
種殊甘脆南方之所無日炙色漸赤兒童已窺覷剝擊
盈數斗鄰舍或求須早知實可食何須種檉榆此木頗
耐旱地宜土不濡所以齊魯間斬伐充薪芻近復得異
種攣拳類人病曲木未可惡惟天付形軀良材却矯揉
不見笏與弧

五言絕句

棗

宋

蘇軾

居人幾番老棗樹未成槎汝長才堪軸吾歸已及瓜

七言絕句

棗花寒

宋 沈遼

山禽哺雛半欲搏坐想葛帔臨風湍數日陰霖復未暢
不知更作棗花寒

寶雞縣

明 汪廣洋

渭河霜滿水如苔一縣人家半草萊唯有秋風酸棗木
淡煙深鎖鬪雞臺

欽定四庫全書

御定詠物詩選

卷三百二

御定佩文齋詠物詩選卷三百二

欽定四庫全書薈要卷一萬八千九百二十五

集部

御定佩文齋詠物詩選卷三百三

柰類

五言古

詠柰

梁

褚雲

成都貴素質酒泉稱白麗
紅紫奪夏藻芬芳掩春蕙
映日照新芳叢林抽晚蒂
誰謂重三珠終焉競八桂
不讓園丘中粲潔華庭際

和蕭國子詠柰花

梁謝頊

俱榮上節初獨秀高秋晚吐綠變哀園舒紅搖落苑不
逐奇幻生寧從吹律暖幸同瑤華折為君聊贈遠

五言律

豎子至

唐杜甫

攄梨且綴碧梅杏半傳黃小子幽園至輕籠熟柰香山
風猶滿把野露及新嘗欲寄江湖客提携日月長

七言絕句

撥悶

明

朱多炆

雨暗春城十萬家
強搯髣髴几到棲鴉
峭風欲閣遊人屐
吹盡牆頭柰子花

御定佩文齋詠物詩選卷三百三

欽定四庫全書薈要卷一萬八千九百二十六

集部

御定佩文齋詠物詩選卷三百四

柑類

四言古

甘頌

晉宗炳

煌煌嘉實磊如景星南金其色隋珠其形

五言古

詠柑

陳徐陵

朱實挺江南苞品擅珍淑上林雜嘉樹江潭間修竹萬
室擬封侯千株挺荆國綠葉萋以布素榮芬且郁得陳
終宴歡良垂雲雨育

阻雨不得歸灤西甘林

唐 杜 甫

三伏適已過驕陽化為霖欲歸灤西宅阻此江浦深壞
舟百板圻峻岸復萬尋篙工初一棄恐泥勞寸心佇立
東城隅悵望高飛禽草堂亂玄圃不隔崑崙岑昏渾衣
裳外曠絕同層陰園甘長成時三寸如黃金諸侯舊上

計厥貢傾千林邦人不足重所迫豪吏侵客居暫封殖
日夜偶瑤琴虛徐五株態側塞煩胸襟焉得輟雨足杖
藜出嶇嶇欽條流數翠實偃息歸碧潯拂拭烏皮几喜聞
樵牧音令兒快搔背脫我頭上簪

五言律

樹間

唐
杜 甫

岑寂雙柑樹婆娑一院香交柯低几杖垂實礙衣裳滿
歲如松碧同時待菊黃幾回霜葉露乘月坐胡床

甘園

杜甫

春日清江岸千甘二頃園青雲羞葉密白雪避花繁結
子隨邊使開筒近至尊後於桃李熟終得獻金門

五言排律

詠宗良兄齋頭佛手柑

明

朱多炆

春雨空花散秋霜碩果低牽枝出纖素隔葉卷柔荑指
豎禪師悟拳開法嗣迷疑將灑甘露似欲攬伽梨色現
黃金界香分肉麝臍願從靈運後接引證菩提

七言律

柳州城西北隅種甘樹

唐
柳宗元

手種黃柑二百株，春來新葉徧城隅。
方同楚客憐皇樹，不學荊州利木奴。
幾歲開花聞噴雪，何人摘實見垂珠。
若教坐待成林日，滋味還堪養老夫。

師黯以彭甘五子為寄，因懷四明園中此果甚多，偶成長句以為謝。

宋
蘇舜欽

憶向江東太守園，猗猗甘樹蔽前軒。
風搖玉蕊霏微落，

霜發金衣委隊繁枕畔冷香通醉夢齒邊餘味滌吟魂
天彭路遠無因得猶賴君心記舊恩

襄柑分惠景仁以詩將之

宋 韓 維

荊州解綬十經春迴夢青林繞漢濱霜氣輕寒催紺實
渚波餘潤作甘津僧園採掇寧論數客路奔馳竟占新
雪意垂收高會缺分金聊助席間珍

食柑

宋 蘇 軾

一雙羅帕未分珍林下先嘗媿逐臣露葉霜枝剪寒碧

金盤玉指破芳辛
清泉蔌蔌先流齒
香霧霏霏欲喫人
坐客殷勤為收子
千奴一掬奈吾貧

曾父八餉洞庭柑

宋 曾幾

黃柑送似得吾新
坐我松江震澤濱
想見霜林三百顆
夢成羅帕一雙珍
流泉噴霧真宜酒
帶葉連枝絕可人
莫向君家樊素口
瓠犀微齟遠山顰

訪曉庵禪師師以洞庭柑為供

明

張和

十年不到白龍潭
延慶名僧始一叅
石鼎未烹陽羨茗
金盤先獻洞庭柑
檐前暮雨霑天棘
席外春風動石楠
明日又從江上別
九峰惆悵隔晴嵐

七言絕句

酬郭簡州寄柑子

唐 薛 濤

霜規不讓黃金色
圓質仍含御史香
何處同聲情最異
臨川太守謝家郎

和王晉卿傳柑

宋 蘇 軾

侍史傳柑玉座傍
人間艸木盡天漿
寄與維摩三十顆
不知蔭蔔是餘香

跋小寺舊題

宋 劉克莊

禪几曾陪白氎巾
柑花似雪鬪芳新
而今柑子圓如彈
不見澆花供佛人

竹枝詞

明 吳鼎芳

南濠有客寄書還
夫婿黃柑已趁錢
幾日不來湖上棹
休教重上贛州船

御定佩文齋詠物詩選卷三百四

欽定四庫全書薈要卷一萬八千九百二十七

集部

御定佩文齋詠物詩選卷三百五

橘類 附金橘

五言古

古詩

漢 闕名

橘柚垂華實乃在深山側聞君好我甘竊獨自雕飾委
身玉盤中歷年異見食芳菲不相投青黃忽改色人儻
欲我知因君為羽翼

橘

晉張華

橘生湘水側
菲陋人莫傳
逢君金華宴
得在玉几前

詠橘

梁簡文帝

萎蕤暎庭樹
枝葉凌秋芳
故條雜新實
金翠共含霜
攀枝折縹幹
甘旨若瓊漿
無假存雕飾
玉盤余自嘗

園橘

梁沈約

綠葉凝露滋
朱苞待霜潤
但令入玉梓
金衣非所恡

園橘

梁范雲

芳條結寒翠圓實變霜朱徙根楚州上來覆廣庭隅

詠橘

梁 徐 摛

麗樹標江浦結翠似芳蘭焜煌玉衡散照曜金衣丹愧
以無雕飾徒然登玉盤

橘詩

梁 虞 羲

衝飈發隴首朔雪度炎洲摧折江南桂離披漠北楸獨
有凌霜橘榮麗在中州從來自有節歲暮將何憂

園中雜詠橘樹

隋 李孝貞

嘉樹出巫陰分根徙上林白華如散雪朱實似懸金布
影臨丹地飛香度玉岑自有凌冬質能守歲寒心

南中榮橘柚

唐柳宗元

橘柚懷貞質受命此炎方密林耀朱綠晚歲有餘芳殊
風限清漢飛雪滯故鄉攀條何所歎北望熊與湘

橘中篇

元楊載

並海無山林莽莽皆平疇君家擇地利即此營菟裘雜
樹作藩屏青紅間綢繆其中植橘柚擁蔽枝葉稠盛夏

開白華朱實懸高秋飛霜虐萬物寒風助颼颼凌晨察
變候策杖巡維陬是何黃金多暴露宜藏收採摘資衆
力轉輸及他州子長傳貨殖謂此同列侯上充國家賦
下貽筐筥謀千縑可坐致何必龍陽洲

橘

明
孫七政

美人有嘉樹結實如黃金微霜降秋節芬芳滿中林采
采不盈篋歲暮遠相尋緘以尺素書致以瑤華音開緘
讀素書字字瑯與琳把玩不去手置我高堂陰恍行洞

庭上秋色瀟湘深
況此東南美橘頌
步高吟橘柚匪芬
芳荷君芬芳心

七言古

附長短句

諒公洞庭孤橘歌

唐顧況

不種自生一株橘
誰教渠向堦前出
不羨江陵千木奴
下生白蟻子上生
青雀雛飛花蔭
葡萄旃檀香結實
如綴摩尼珠
洞庭橘樹籠煙碧
洞庭波月連沙白
待取天公放恩赦
儂家定作湖中客

題大理評事王元老雙橘堂

金 党懷英

朱橘復朱橘傳分包貢實煌煌中堂榜奇畫照公堂前
護草碧公今致養豐祿食更取蠻珍奉顏色舉觴一笑
三千秋坐看諸孫索梨栗

五言律

橘

唐 李嶠

萬里盤根直千株布葉繁
既榮潘子賦方重陸生言
玉蘂含霜動金衣逐吹翻
願辭湘水曲長茂上林園

橘花

宋楊萬里

花淨何須艷林深不隔香
初聞何處覓小摘莫令長春
落秋仍發梅兼雪未強縹瓷
汲寒砌淺浸一枝涼

其二

不夜非關月無風也自香著
花能許細落子不多長玉
糝開猶半金鬚然更強解愁
何必醉遇暑却生涼

歲暮

金吳激

天南家萬里江上橘千頭
夢繞閭門迥霜飛震澤秋

深宜映屋香遠解隨舟懷袖何時獻庭闈底處愁

七言律

揀貢橘書情

唐

白居易

洞庭貢橘揀宜精
大守勤王請自行
珠顆形容隨日長
瓊漿氣味得霜成
登山敢惜駑駘力
望闕難伸螻蟻情
疎賤無由親跪獻
願憑朱實表丹誠

橘園

唐

李紳

江城霧斂輕霜早
園橘千株欲變金
朱實摘時天路近

素英飄處海雲深懼同枳棘愁遷徙每抱馨香委照臨
憐爾結根能自保不隨寒暑換貞心

奉和揀貢橘

唐張彤

凌霜遠涉太湖深雙卷朱旗望橘林樹樹籠煙疑帶火
山山照日似懸金行看採摘方盈手暗覺馨香已滿襟
揀選封題皆盡力無人不感近臣心

襲美以春橘見惠兼之雅篇因次韻酬謝

唐陸龜蒙

到春猶作九秋鮮應是親封白帝煙良玉有漿須讓味
明珠無類亦羞圓堪居漢苑霜梨上合在仙家火棗前
珍重更過三十子不堪分付野人邊

奉和揀貢橘

唐
周元範

離離朱實綠叢中似火燒山處處紅影下寒林沉碧水
光搖高樹照晴空銀章自竭人臣力玉液誰知造化功
看取明朝般發後餘香猶尚逐仁風

橘花

宋
劉克莊

一種靈根有異芬初開猶勝結丹黃白於蘆蔔林中見
清似旃檀國裏聞淡月珠胎明璀璨微風玉屑撼繽紛
平生荀令熏衣癖露坐花間至夜分

次韻謝朱伯初惠橘

元趙汴

谿上山中兩絕塵惟應黃綺最相親治生每媿奴無術
行酒空聞脯有麟丹實結容朝得句錦囊馳贈座生春
年年移作朱門供漫想山林色正勻

橘

明王世貞

曾因騷客稱嘉樹從此名畱貢篚間淮浦孤蹤一水隔
洞庭千樹兩峰殷煙霞自與長生液霜霰翻來漸老顏
碁局便須相伴住未煩塵世訪商山

謝惠橘

明僧妙聲

洞庭嘉實正離離滿樹黃金欲采遲香比陸郎懷去後
霜如韋守寄來時開嘗直想千林晚包貢空含萬里悲
江漢風塵愁路絕食新聊得一開眉

五言絕句

江行

唐錢起

輕雲未護霜樹杪橘初黃信是知名物微風過水香

東邨

明葛一龍

曾聞東園公住此不復出年年開白花猶是漢時橘

七言絕句

答鄭騎曹青橘絕句

唐韋應物

憐君卧病思新橘試摘猶酸亦未黃書後欲題三百顆
洞庭須待滿林霜

庭橘

唐
僧貫休

蟻踏金包四五株
洞庭山上味何殊
不緣松樹稱君子
肯便甘人喚木奴

橘堤

宋
朱子

君家池上幾時栽
千樹玲瓏亦富哉
荷盡菊殘秋欲老
一年佳處眼中來

秋日田園雜興

宋
范成大

新霜徹曉報秋深
染盡青林作纈林
惟有橘園風景異

碧叢叢裏萬黃金

橘枝詞記永嘉土風

宋葉適

蜜滿房中金作皮人家短日挂疎籬判霜剪露裝船去
不唱楊枝唱橘枝

伯堅惠綠橘

金劉著

黃苞猶帶洞庭霜翠袖傳看綠葉香何待封題三百顆
只今詩思滿江鄉

齋居即事用教徵君韻

元范梈

故人不見意何如流水孤邨處士廬猶記去年霜橘熟
分甘曾得寄來書

夏日雜興

元僧善住

中庭日午橘花開蜂蝶何知故故來一陣南薰生殿角
亂飄香雪點蒼苔

寄三江王六秀才

明袁凱

滄洲荷屋晚秋時橘柚青黃滿戶垂安得扁舟趁潮去
醉看江雨散輕絲

過流通院

明高啟

橘柚林中薜荔垣幽尋幾度入秋園雖然老衲無聞見
猶勝相逢俗客言

橘

明陳繼儒

睡起難禁酒力加醉時隨卧白鷗沙艸堂位置新籬落
蕉葉西邊橘試花

附金橘

七言律

和賜後苑金橘

宋李清臣

苑臣初摘置瑇盤口敕宣恩賜近官氣味豈同淮枳變
皮膚不作楚梅酸參差翠葉藏珠琲錯落黃金鑄彈丸
安得一株擎雨露畫圖傳與世人看

七言絕句

歐陽從道許寄金橘以詩督之

宋黃庭堅

禪客入秋無信息想依紅袖醉瑤璫霜枝搖落黃金彈

許送筠籠殊未來

御定佩文齋詠物詩選卷三百五

欽定四庫全書薈要卷一萬八千九百二十八

集部

御定佩文齋詠物詩選卷三百六

橙類

七言律

詠橙

宋梅堯臣

洞庭朱橘未弄色
襄水錦橙多已黃
玉臼擣齏憐鱸美
金盤按酒助杯香
雖生南土名猶重
未信中州客厭嘗
欲寄百苞憑驛去
只應佳味怯風霜

九日南陵送橙菊

明 李夢陽

朱門美菊采先芳，玉圃新橙摘早霜。
傳送滿盤真鬪色，分看隨手各矜香。
深憐便合携樽酌，暫貯應須得蠹嘗。
獨醉秋堂卧風物，一年晴雨任重陽。

七言絕句

橙

宋 歐陽修

嘉樹團團俯可攀，壓枝秋實漸瀾斑。
朱闌碧瓦清霜曉，鑿鑿繁星綠葉間。

香橙徑

宋
蘇軾

金橙縱復里人知不見鱸魚價自低
須是松江煙雨裏小船燒薤擣香齏

贈劉景文

蘇軾

荷盡已無擎雨蓋菊殘猶有傲霜枝
一年好景君須記正是橙黃橘綠時

橙

宋
黃庭堅


誰將金闕真黃色借與洞庭霜後橙
松滋解作逡巡麴

壓倒江南好事僧

船上謠

明王弼

千艘飛過石頭城
獵獵黃旗發鼓聲
中使面前傳令急
南十月進香橙



御定佩文齋詠物詩選卷三百六



總校官庶吉士臣侍朝

校對官庶吉士臣嚴福

校對官修撰臣張書勳

謄錄監生臣徐大豐

謄錄監生臣陸學稼

欽定四庫全書管要

集部

御定詠物詩選卷三百

七至
十七

詳校官原任主事

李斯咏

欽定四庫全書薈要卷一萬八千九百二十九

集部

御定佩文齋詠物詩選卷三百七

榴花類

五言古

詠石榴

梁元帝

塗林未應發春暮轉相催
然燈疑夜火連珠勝早梅
西域移根至南方釀酒來
葉翠如新剪花紅似故栽
還憶河陽縣映水珊瑚開

詠石榴

隋 魏 澹

分根金谷裏移植廣庭中新枝含淺綠晚萼散輕紅影
入環堦水香隨度隙風路遠無由寄徒念春閨空

石榴

隋 孔紹安

可惜庭中樹移根逐漢臣只為來時晚開花不及春

詠鄰女東窓海石榴

唐 李 白

魯女東窓下海榴世所稀珊瑚映綠水未足比光輝清
香隨風發落日好鳥歸願為東南枝低舉拂羅衣無由

共攀折引領望金扉

新植海石榴

唐

柳宗元

弱植不盈尺遠意駐蓬瀛月寒空塔曙幽夢綵雲生糞壤擢珠樹莓苔插瓊英芳根悶顏色徂歲誰為榮

石榴

宋

梅堯臣

榴枝苦多雨過熟坼已半秋雷石罌破曉日丹砂爛任從雕俎薦豈待霜刀判張騫西使時蒟醬同歸漢

石榴

元

朱德潤

雨餘鳴蜩歇衆綠鬱陰翳綃囊感紅巾光焰當林麗映
日萼先皺臨風葉如綴秋深薦紅實顆裂排皓齒祇應
乘槎客天上得仙味

榴

明
吳寬

團團復亭亭園子巧相競都下朝千盆花市此為盛我
獨解其縛高枝遂其性參差花更繁緋綠錯相映安石
名已蒙休從謝公姓

七言古

榴花

金
元德明

山茶赤黃桃絳白
戎葵米囊不入格
庭中忽見安石榴
歎息花中有真色
生紅一撮掌上看
模寫雖工更覺難
詩到黃州隔千里
畫家辛苦費鉛丹

五言律

詠樓前海石榴

唐
孫逖

客自新亭郡
朝來數物華
傳君畫樓好
初發海榴花
露色珠簾映
香風粉壁遮
更宜林下雨
日晚逐行車

海榴

唐 溫庭筠

海榴開似火先解報春風
葉亂裁牋綠花宜插鬢紅
蠟珠攢作蒂絳綵剪成叢
鄭驛多歸思相期一笑同

石榴

宋 鄭獬

高枝重欲折霜老折丹膚
試剖紫金碗滿堆紅玉珠
根雖傳大夏種必近仙都
題作江南信人應賤橘奴

七言律

見穆三十中庭海榴花謝

唐 杜牧

矜紅掩素似多才不待櫻桃不逐梅春到未曾逢宴賞
雨餘爭解免低徊巧窮南國千般艷趁得東風二月開
堪恨王孫浪遊去落英狼籍始歸來

庭際海石榴花盛發有寄

唐皮日休

一夜春光綻絳囊碧油枝上晝煌煌風勻祇似調紅露
日暖唯憂化赤霜火齊滿枝燒夜月金津含蕊滴朝陽
不知桂樹知情否無限同游阻陸郎

奉和海石榴花發次韻

唐陸龜蒙

紫府真人餉露囊
倚蘭燈燭未熒煌
丹華乞曙先侵日
金焰欺寒却照霜
誰與佳名從海曲
祇應芳裔出河陽
那堪謝氏庭前見
一段清香染郗郎

海石榴

唐方干

亭際天妍日日看
每朝顏色一般般
滿枝猶待春風力
數朶先欺臘雪寒
舞蝶似隨歌拍轉
遊人只怕酒杯乾
久長年少應難得
忍不叢邊到夜觀

石榴

宋楊萬里

深著紅藍染暑裳
琢成文玳敵秋霜
半含笑裏清冰齒
忽綻吟時古錦囊
霧縠作房珠作骨
水精為醴玉為漿
劉郎不為文園渴
何苦星槎遠取將

榴火

明
朱之蕃

天付炎威與祝融
海波如沸沃珍叢
飛將寶鼎千重燄
煉就丹砂萬點紅
自抱赤衷迎曉日
應慚艷質媚春風
農家賴實需甘雨
愁擬焚林望碧空

五言絕句

移海榴

唐
韋應物

葉有苦寒色
山中霜雪多
雖此蒙陽景
移根意若何
同張侍御詠興寧寺經藏院海石榴花

唐
皇甫冉

嫩葉生初茂
殘花少更鮮
結根龍藏側
故欲競青蓮

石榴

宋
范成大

日烘古錦囊
露浥紅瑪瑙
玉池噉清肥
三彭跡如掃

詠石榴花

元
楊維禎

密幄千重碧疎巾一櫺紅花時隨早晚不必嫁春風

七言絕句

詠張十一旅舍榴花

唐
韓愈

五月榴花照眼明
枝間時見子初成
可憐此地無車馬
顛倒青苔落絳英

題韋潤州後亭海榴

唐
李嘉祐

江上年年小雪遲
年光獨報海榴知
寂寂山城風日暖
謝公含笑向南枝

韋使君宅海榴詠

唐 權德輿

淮陽卧理有清風
臘月榴花帶雪紅
閑閣寂寥常對此
江湖心在數枝中

石榴

唐 李商隱

榴枝婀娜榴實繁
榴膜輕明榴子鮮
可羨瑤池碧桃樹
碧桃紅頰一千年

奉和文堯對庭前千葉石榴

唐 黃滔

一朵千英綻曉枝
采霞堪與別為期
移根若在芙蓉苑

豈向當年有醒時

河陰道中

金

王庭筠

微行入麥去斜斜才過深林又幾家
一色生紅三十里
際山多少石榴花

榴花

元

張弘範

猩血誰教染絳囊綠雲堆裏潤生香
遊蜂錯認枝頭火
忙駕薰風過短牆

趙中丞折枝圖

石榴

元

馬祖常

乘槎使者海西來移得珊瑚漢苑栽
只待綠陰芳樹合蕊珠如火一時開

御定佩文齋詠物詩選卷三百七

欽定四庫全書薈要卷一萬八千九百三十

集部

御定佩文齋詠物詩選卷三百八

柿類

五言古

詠無核紅柿

宋

孔平仲

林中有丹果壓枝一何稠為柿已軟美嗟爾骨亦柔風
霜變顏色雨露如膏油大哉造化心于爾何綢繆荆筐
載趨市價賤良易求剖心無所有入口頗相投為栗外

屈強老者所不收為棗中亦剛飼兒戟其喉衆言咀嚼
快唯爾無所憂排羅置前列圓熟當高秋且以悅一時
長久豈暇謀吐哉潰爛速棄擲將誰尤

五言絕句

红柿子

唐

劉禹錫

曉連星影出晚帶日光懸本因遺採掇翻自保天年

柿

宋

韓維

朱果繁霜後甘甜半自零忽驚林色曙零落見殘星

七言絕句

華師

唐
李商隱

孤鶴不睡雲無心
衲衣筇杖來西林
院門晝鎖迴廊靜
秋日當階柿葉陰

柿

宋
劉子翬

秋林黃葉晚霜嚴
熟蒂甘香未得兼
火傘虬珠浪裊拂
風標却似邑中黔

柿

明
陳汝秩

晚風吹雨過林廬
柿葉飄紅手自書
無限瀟瀟江海意
一樽相對憶鱸魚

御定佩文齋詠物詩選卷三百八

欽定四庫全書薈要卷一萬八千九百三十一

集部

御定佩文齋詠物詩選卷三百九

楊梅類

七言古

初食楊梅

明

楊循吉

楊梅本是我家果歸來相對歎先作往來南北將十年
久不食汝幾忘却憶從年少在吳中食以成傷難療藥
年年端午即有之街頭賣折先附郭初間生酸帶青色

次見熟從枝上落吳儂好奇不論錢一味纔逢傾倒索
生時熏蒸喜烈日所怕狂風陰雨虐有紅有白紫者佳
大如彈丸圓可握生芒刺口易破碎到牙甘露先流齧
黃船奉貢晝夜走數枚出賜惟臺閣其餘官小那得預
說著江南懷頗惡吳人鹽蜜百計收不知本味終枯涸
肉存液去但有名奪以酸甜無可嚼我今到家又遇夏
正是高林雨方濯滿盤新摘恣狂啖十指染丹如茜著
細思口實亦小事其來乃以微官博使余不有故山歸

安得香鮮列惟錯人生百年有適意忍口勞勞何所樂
七言律

謝丘師楊梅

宋 楊萬里

梅出稽山世少雙情知風味勝他楊玉肌半醉生紅粟
墨暈微深染紫囊火齊堆盤珠徑寸醴泉浸齒蔗為漿
故人解寄吾家果未變蓬萊閣下香

白楊梅

明 瞿 佑

乃祖楊朱族最奇諸孫清白又分枝炎風不解消冰骨

寒栗偏能上玉肌異味每煩山客贈靈根猶是聖僧移
水晶盤薦華筵上酪粉鹽花兩不知

謝于喬送楊梅乾無詩用前韻奉索

明

李東陽

深夜柴門闔更開楊梅香送滿罌來霜乾淺帶層冰結
紅爛紛成萬粟堆坐愛春盤裝磊落憶從秋樹採崔嵬
莫教俗却先生饋佳句重煩答後裁

五言絕句

平望夜泊

明 王穉登

雨多楊梅爛青筐滿山市兒女當夕食
媯然口脣紫

御定佩文齋詠物詩選卷三百九

欽定四庫全書蒼要卷一萬八千九百三十二 集部

御定佩文齋詠物詩選卷三百十

核桃類

七言古

送鶴林長老胡桃一裹茶三角

元
薩都拉

胡桃殼堅乳肉肥香茶雀舌細葉奇枯腸無物不可用
寄與說法談禪師竹龍吐雪澗水活茅屋烟炊樹雲薄

竹院深沈有客過
碎桃點茶亦不惡

七言律

胡桃

宋 楊萬里

三韓萬里半天松
方丈蓬萊東復東
珠玉鎖成千歲實
冰霜吹落九秋風
酒邊膈膊牙車響
座上須臾棹櫓空
新果新嘗正新暑
繡衣使者念山翁

七言絕句

對客

元 薩都拉

石榴花開光照屋胡桃葉大陰滿簾焚香終日對客坐
時有白雲來纖纖

御定佩文齋詠物詩選卷三百十

欽定四庫全書薈要卷一萬八千九百三十三

集部

御定佩文齋詠物詩選卷三百十一

枇杷花類

五言古

題枇杷樹

唐
羊士諤

珍樹寒始花
氤氲九秋月
佳期若有待
芳意常無絕
媚媚碧海風
濛濛綠枝雪
急景自餘妍
春禽幸流悅

五言律

衛明府寄枇杷葉以詩答之

唐司空曙

頃筐呈綠葉重疊色何鮮詎是秋風裏猶如曉露傳仙
方當見重消疾本應便全勝甘蕉贈空投謝氏篇

真覺院有洛花花時不暇往四月十八日與劉

景文同往賞枇杷

宋蘇軾

綠暗初迎夏紅殘不及春魏花非老伴盧橘是鄉人井
落依山盡巖崖發興新歲寒君記取松雪看蒼鱗

枇杷

宋楊萬里

大葉聳長耳一梢堪滿盤荔支多與核金橘却無酸雨
壓低枝重漿流水齒寒長卿今在否莫遣作園官

七言律

山枇杷花

唐
白居易

深山老去惜年華況對東谿野枇杷火樹風來翻絳艷
瓊枝日出曬紅紗迴看桃李都無色映得芙蓉不是花
爭奈結根深石底無因移得到人家

賜鮮枇杷

明
于慎行

嘉名漢苑舊標奇
北客由來自不知
綠萼經春開籠日
黃金滿樹入筐時
江南漫道珍盧橘
西蜀休稱薦荔枝
千里梯航來不易
懷將餘核志恩私

五言絕句

枇杷

宋 祁

有果產西蜀作花凌
早寒樹繁碧玉葉
柯疊黃金丸

七言絕句

山枇杷花

唐 白居易

萬重青嶂蜀門口一樹紅花山頂頭春盡憶家歸未得
低紅如解替君愁

枇杷

宋
梅堯臣

五月枇杷黃似橘誰思荔支同此時嘉名已著上林賦
却恨紅梅未有詩

桐廬道中

宋
楊萬里

肩輿坐睡茶力短野堠無人山路長鴉鵲聲懽人不會
枇杷一樹十分黃

邨居

元倪瓚

疎疎梅雨橘花香
寂寂桐陰研席涼
怪底林間金彈子
枇杷都熟不知嘗

御定佩文齋詠物詩選卷三百十一

欽定四庫全書薈要卷一萬八千九百三十四集部

御定佩文齋詠物詩選卷三百十二

櫻桃類

五言古

朱櫻

宋

王僧達

初櫻動時艷擅藻灼輝芳
緗葉未開蕊紅葩已發光

奉答南平王康賚朱櫻

梁

簡文帝

倒流映碧叢點露擎朱實
花茂蝶爭飛枝濃鳥相失已

麗金釵瓜仍美玉盤橘寧異梅似丸不羨萍如日永植
平臺垂長與雲柱密徒然奉推甘終以愧操筆

賦得櫻桃春字韻

唐太宗

華林滿芳景洛陽徧陽春朱顏含遠日翠色影長津喬
柯轉嬌鳥低枝映美人昔作園中實今為席上珍

五言律

同諸客携酒早看櫻桃花

唐白居易

曉報櫻桃發春携酒客過綠飴粘盞杓紅雪壓枝柯天

色清明少人生事故多停杯替花語不醉擬如何

深樹見一顆櫻桃尚在

唐

李商隱

高枝留晚實尋得小庭南矮墮綠雲髻歎危紅玉簪惜
堪充鳳食痛已被鴛含越鳥誇香荔齊名亦未甘

櫻桃花

明

吳國倫

御苑含桃樹花開作雪看誰移荒署裏偏助早春寒逞
素愁金谷垂珠遲玉盤不知蕭穎士何意獨相殘

荆谿遊櫻桃園

明

王叔承

珠林光萬點紅亂野園芳艷奪桃花彩甘驕荔子漿女
翻雙腕白鶯溜一衣黃問是誰家勝江東顧辟疆

五言排律

和詠廨署有櫻桃

唐

孫逖

上林天禁裏芳樹有紅櫻江國今來見君門春意生香
從花綬轉色繞佩珠明海鳥銜初實吳姬掃落英切將
稀取貴羞與衆同榮為此堪攀折芳蹊處處成

訓裴傑秀才新櫻

唐

權德輿

新果真瓊液來應宴紫蘭圓疑竊龍頷色已奪雞冠遠
火微微辨殘星隱隱看茂先知味易曼倩恨偷難忍用
烹騁酪從將翫玉盤流年如可駐何必九華丹

與沈楊二舍人閣老同食敕賜櫻桃翫物感恩

因成十四韻

唐
白居易

清曉趨丹禁紅櫻降紫宸驅禽養得熟和葉摘來新圓
轉盤傾玉鮮明籠透銀內園題兩字西掖賜三臣榮惑
晶華赤醖醐氣味真如珠未穿孔似火不燒人杏俗難

為對桃頑詎可倫
肉嫌盧橘厚皮笑荔枝皺瓊液酸甜
足金丸大小勻
偷須防曼倩惜莫擲安仁手擘纔離核
匙抄半是津甘為舌上露煖作腹中春
已懼長尸祿仍驚數食珍
最慚恩未報飽饒不才身

七言律

敕賜百官櫻桃

唐

王維

芙蓉闕下會千官
紫禁朱櫻出上闌
纔是寢園春薦後
非關御苑鳥銜殘
歸鞍競帶青絲籠
中使頻傾赤玉盤

飽食不須愁內熱大官還有蔗漿寒

野人送朱櫻

唐
杜甫

西蜀櫻桃也自紅野人相贈滿筠籠數回細寫愁仍破
萬顆勻圓訝許同憶昨賜霑門下省退朝擎出大明宮
金盤玉筋無消息此日嘗新任轉蓬

和張員外敕賜百官櫻桃

唐
韓愈

漢承舊種明光殿炎帝還書本草經豈似滿朝承雨露
共看傳賜出青冥香隨翠籠擎初到色映銀盤瀉未停

食罷自知無所報空然慚汗仰皇局

朝日敕賜百官櫻桃

唐
張籍

仙果人間都未有今朝忽見下天門捧盤小吏初宣敕
當殿羣臣共拜恩日色遙分廊下座露香纔出禁中園
每年從此長先熟願得千春奉至尊

東吳櫻桃

唐
白居易

含桃最說出東吳香色鮮穠氣味殊洽恰舉頭千萬顆
婆娑拂面兩三株鳥偷飛處銜將火人摘爭時蹋破珠

可惜風吹兼雨打明朝後日即應無

北樓櫻桃花

唐

李紳

開花占得春光早雪綴雲裝萬萼輕凝艷折時初照日
落英頻處乍聞鶯舞空柔弱看無力帶月蔥蘢似有情
多事東風入閨闥盡飄芳思委江城

櫻桃

宋

楊萬里

櫻桃一雨半彫零更與黃鸝翠羽爭計會小風留紫脆
殷勤落日弄紅明摘來珠顆光如濕走下金盤不待傾

天上薦新舊分賜兒童猶解憶寅清

予舊在奉常孟夏太廟薦櫻桃禮官

各分賜四籃奉

常有寅清堂

七兒應復同客飲櫻桃園摘新歸以遺親用其

詩韻識所感

元
牟
獻

尚記當年薦寢園百官分賜荷恩寬帶青絲籠空餘夢
搔白頭人苦不歡詩老誇稱作崖蜜野翁驚看瀉銀盤
南山見說紅千樹鳥雀兒童任入闌

江上櫻桃甚盛而予寓所無有忽蘇城友人惠

一大盒故賦此

明
袁凱

野店荒蹊紅滿枝
煖烟微雨共離披
忽思西蜀勻圓顆
正值東吳遠送時
老子細看方自訝
兒童驚喜欲成癡
拾遺門下曾沾賜
此日飄蓬也賦詩

五言絕句

櫻桃花

唐
劉禹錫

櫻桃千樹枝
照耀如雪天
王孫宴其下
隔水疑神仙

櫻桃樹

宋
文同

偶因移曉雨似欲占春風嫩葉藏新綠繁葩露淺紅

櫻桃

宋

范成大

火齊寶瓔絡垂于綠繭絲幽禽都未覺和露折新枝

櫻桃

明

楊廷和

團于火色貝燦極月光珠西海瑤池苑層城寶樹區

櫻桃花

明

于若瀛

三月雨聲細櫻花疑杏花谿轉開雙笑臨流見浣紗

七言絕句

白櫻桃

唐
李白

紅羅袖裏分明見
白玉盤中看却無疑
是老僧休念誦
腕前推下水晶珠

櫻桃曲

唐
顧況

百舌猶來上苑花
遊人獨自憶京華
遙知寢廟嘗新後
敕賜櫻桃向幾家

和裴僕射看櫻桃花

唐
張籍

昨日南園新雨後
櫻桃花發舊枝柯
天明不待人同看

繞樹重重履跡多

移山櫻桃

唐

白居易

亦知官舍非吾宅且斲山櫻滿院栽上佐近來多五考
少應四度見花開

樟亭雙櫻樹

白居易

南館西軒兩樹櫻春條長足夏陰成素華朱實今雖盡
碧葉風來別有情

摘櫻桃贈元居士時在望仙亭南樓與朱道士

同處

唐

柳宗元

海上朱櫻贈所思
樓居況是望仙時
蓬萊羽客如相訪
不是偷桃一小兒

櫻桃花

唐

張祜

石榴未坼梅猶小
愛此山花四五株
斜日庭前風裊裊
碧油千片漏紅珠

櫻桃花下

唐

李商隱

流鶯舞蝶兩相欺
不取花芳正結時
他日未開今日謝

嘉辰長短是參差

題于公花園

唐

薛能

含桃莊主後園深繁實初成靜掃陰若使明年花可待
應須惱破事花心

春日陪崔諫議櫻桃園宴

唐

皮日休

萬樹香飄水麝風蠟熏花雪盡成紅夜深懽態狀不得
醉客圖開明月中

買帶花櫻桃

唐

吳融

粉紅輕淺靚粧新和露和烟別近鄰萬一有情應有恨
一年榮落兩家春

含桃園

唐
陸希聲

小園初晴風露光含桃花發滿山香看花對酒心無事
倍覺春來白日長

白櫻桃

唐
韋莊

玉母階前種幾株水晶簾外看如無只應漢武金盤上
瀉得珊瑚白露珠

櫻桃花

宋

王安石

山櫻抱石陰松枝比並餘花發最遲
賴有春風嫌寂寞
吹香渡水報人知

初見山花

宋

范成大

三日晴泥尚沒韡幾將風雨過年華
湘東二月春纔到
恰有山櫻一樹花

櫻桃花

范成大

借暖衝寒不用媒
勻朱勻粉最先來
玉梅一見憐癡小

教向傍邊自在開

暮春

宋 楊萬里

花時追賞夜將朝
花過遲眠日儘高
又與山禽爭口腹
執竿挾彈守櫻桃

櫻桃花

元 方回

淺淺花開料峭風
苦無妖色畫難工
十分不肯精神露
留與他時著子紅

絕句

元 台哈布哈

金吾列侍擁旌旄五色雲深雉尾高視草詞臣方退食
內官傳敕賜櫻桃

宮詞

元
納新

上苑含桃熟暮春金盤滿貯進楓宸醍醐清透冰漿滑
分賜階前僊直人

春日湖上

明
鎰泰

櫻桃花發向陽枝便覺韶光暗有期明日重來應爛熳
雙柑斗酒聽黃鸝

御定佩文齋詠物詩選卷三百十二

欽定四庫全書薈要卷一萬八千九百三十五

集部

御定佩文齋詠物詩選卷三百十三

林檎花類

五言古

月臨花

即林檎花

唐

元稹

凌風颺颺花透影
朧朧月巫峽隔波雲
姑峰漏霞雪鏡
勻嬌面粉燈泛高籠
纈夜久清露多啼珠
墜還結

七言古

來禽花

宋 陳與義

來禽花高不受折滿意清明好時節人間風日不貸春
昨夜顰脂今日雪舍東蕪菁滿眼黃蝴蝶飛去專斜陽
妍媸都無十日事付與梧桐一夏涼

五言律

水林檎花

唐 鄭谷

一露一朝新簾籠曉景分艷和蜂蝶動香帶管絃聞笑
擬春無力粧濃酒漸醺直疑風起夜飛去替行雲

七言絕句

來禽

宋
劉子翬

粲粲來禽已著花
芳根誰徙向天涯
好尋青李相遮映
風味應同逸少家

十五夜飲王敬止園亭

明
方太古

客子未歸天一涯
滄江亭上聽新蛙
春風莫漫隨人老
吹落來禽千樹花

御定佩文齋詠物詩選卷三百十三

欽定四庫全書薈要卷一萬八千九百三十六

集部

御定佩文齋詠物詩選卷三百十四

荔枝類

五言古

詠荔枝

梁劉霽

叔師貴其珍武仲稱斯美良由自遠致含滋不留齒
十四夜都司席上餞光祿屠公分賦

明江以達

幕府侈高會長筵列朱纓浮觴無緩箏一曲三四行豈
不誠歡娛之子懷遠征握手一為歎秉燭尋欄檻攀條
摘荔枝枝葉何青青

七言古

四月十一日初食荔枝

宋蘇軾

南邨諸楊北邨盧白華青葉冬不枯垂黃綴紫烟雨裏
特與荔子為先驅海山仙人絳羅襦紅紗中單白玉膚
不須更待妃子笑風骨自是傾城姝不知天公有意無

遣此尤物生海隅
雲山得伴松檜老
霜雪自困楂梨麓
先生洗醖酌桂醕
冰盤薦此蘋虬珠
似開江鱉斫玉柱
更洗河豚烹腹腴
我生涉世本為口
一官久已輕尊罍
人間何者非夢幻
南來萬里真良圖

廖致平送綠荔枝為戎州第一王公權荔枝綠

酒亦為戎州第一

宋黃庭堅

王公權家荔枝綠
廖致平家綠荔枝
試傾一杯重碧色
快剝千顆輕紅肌
撥醕葡萄未足數
堆盤馬乳不同時

誰能同此勝絕味唯有老杜東樓詩

贈陳衆仲秀才纈雲辭

元馬祖常

纈雲織波射金水郎君水西著皮履南陌紫塵十丈高
捋鬚買酒意氣豪萬里將書憑好鳥荔枝千顆團團小
天津不隔少微星閭闔門開夜光曉

五言律

新年

宋蘇軾

荔子幾時熟花頭今已繁探春先揀樹買夏欲論園居

士常携客參軍許叩門明年更有味懷抱帶諸孫

趙景賢送荔枝

宋戴復古

荔子固多種色香俱不同新來嘗小綠又勝擘輕紅大
嚼思千樹分甘僅一籠常觀蔡公譜夢想到莆中

五言排律

題郡中荔枝詩十八韻兼寄楊萬州八使君

唐白居易

奇果標南土芳林對北堂素華春漠漠丹實夏煌煌葉

捧低垂戶枝擎重壓牆始因風弄色漸與日爭光夕訝
條懸火朝驚樹點粧深於紅躑躅大校白檳榔星綴連
心朶珠排耀眼房紫羅裁襯殼白玉裹填瓢早歲曾聞
說今朝始摘嘗嚼疑天上味嗅異世間香潤勝蓮生水
鮮逾橘得霜臙脂掌中顆甘露舌頭漿物少尤珍重天
高苦渺茫已教生暑月又使阻遐方粹液靈難駐妍姿
嫩易傷近南光景熱向北道途長不得充王賦無由寄
帝鄉唯君堪擲贈面白似潘郎

荔枝

宋陶弼

五月南遊渴欣逢荔子丹殼勻仙鶴頂肉露水晶丸色
映離為火甘殊木作酸枝繁空相染樹重欲成團赤蚌
遺珠顆紅犀露角端爽能消內熱潤可濯中乾一簇冰
蠶繭千苞火鳳冠隔瓢銀葉嫩透膜玉漿寒

七言律

重寄荔枝與楊使君時聞楊使君欲種植故有

落句戲之

唐白居易

摘來正帶凌晨露寄去須憑下水船映我緋衫渾不見
對公銀印最相鮮香連翠葉真堪畫紅透青籠實可憐
聞道萬州方欲種愁君得喫是何年

荔枝樹

唐
鄭谷

二京曾見畫圖中數本芳菲色不同孤棹今來巴徼外
一枝煙雨思無窮夜郎城近含香瘴杜宇巢低起暝風
腸斷渝瀘霜霰薄不教葉似灞陵紅

南海陪鄭司空遊荔園

唐
曹松

荔枝時節出旌旂
南國名園盡興遊
亂結羅紋照襟袖
別含瓊露爽咽喉
葉中新火欺寒食
樹上丹砂勝錦州
他日為霖不將去
也須圖畫取風流

荔枝

唐

徐夔

日日熏風捲瘴煙
南園珍果荔枝先
靈鴉啄破瓊津滴
寶氣盛來蚌腹圓
錦里只聞消醉渴
蕊宮惟合贈神仙
何人刺出猩猩血
深染羅紋遍殼鮮

次韻劉燾撫寄蜜漬荔枝

宋

蘇軾

時新滿座聞名字別久何人記色香葉似楊梅蒸霧雨
花如盧橘傲風霜每憐尊菜下鹽豉肯與葡萄壓酒漿
回首驚塵卷飛雪詩情真合與君嘗

次韻曾仲錫承議食蜜漬生荔枝

蘇軾

代北寒蠶擣韭萍奇苞零落似晨星逢鹽久已成枯腊
得蜜猶疑是薄刑欲就左慈求拄杖便隨李白跨滄溟
攀條與立新名字兒女稱呼恐不經

和程大夫荔枝

宋唐庚

家在岷峨飽荔枝十年遊宦但神馳側生流落今千載
入貢稱珍彼一時定自不將凡果比如何偏與瘴烟宜
白頭莫作江南客辜負山中故友期

福帥張道淵荔子

宋曾幾

豈無重碧實瓶罍難得輕紅薦一杯千里人從閩嶺出
三年公送荔枝來玉為肌骨涼無汗雲作衣裳皺不開
莫訝關情向尤物厭看綠李與楊梅

走筆謝吉守趙判院分餉三山荔枝

宋

楊萬里

吾州五馬住閩山分我三山荔子丹甘露落來雞子大
曉風凍作水晶團西川紅錦無此色南海綠羅猶帶酸
不是今年天不暑玉膚照得野人寒

次韻謝新荔

元

黃石翁

海國仙人剪絳霞年年一朵到仙家眼中玉色如何晏
席上風流得孟嘉野客不分唐殿帶老臣并按建谿茶

醉來往事都休問
且擘輕紅對晚花

七言絕句

解悶

唐
杜甫

憶過廬戎摘荔枝
青楓隱映石逶迤
京華舊見無顏色
紅顆酸甜只自知

荔枝樓對酒

唐
白居易

荔枝新熟雞冠色
燒酒初開琥珀香
欲摘一枝傾一盞
西樓無客共誰嘗

荔枝詩

唐 薛能

顆如松子色如櫻
未識蹉跎欲半生
歲杪監州曾見樹
時新入座久聞名

荔枝

唐 韓偓

巧裁霞片裊神漿
崖蜜天然有異香
應是仙人金掌露
結成冰入茜羅囊

其二

封開玉籠雞冠澀
葉襯金盤鶴頂鮮
想得佳人微露齒

翠釵先取一枝懸

憶荔枝

唐薛濤

傳聞象郡隔南荒
絳實豐肌不可忘
近有青衣連楚水
素漿還得類瓊漿

荔枝

宋蔡襄

翠葉纖枝雜絳囊
使君分寄驛人忙
彩毫分處曾留筆
茗片開時不減香

荔枝

宋蘇軾

羅浮山下四時春
盧橘楊梅次第新
日啖荔枝三百顆
不妨長作嶺南人

書事

宋戴復古

打鼓行船未有期
恰如江上阻風時
詩中一段閒公事
幸不妨人喫荔枝

荔枝

宋洪駒父

仙果携從海上山
露華供液鶴分丹
硃砂芒刺羞紅顆
龍目團圓避赤丸

戎州

宋 汪元量

錦荔戎州第一奇，大如雞子壓枝垂。
金刀剪下三千顆，對客從容把酒卮。

初至崖州喫荔枝

宋 僧惠洪

口腹平生厭事治，上林珍果亦嘗之。
天公見我流涎甚，遣向崖州喫荔枝。

呼喇美御史還臺索詩二絕為別

錄一

元 程鉅夫

曾此觀風慣土風老榕能識舊花驄如何又踏秦淮月
不待炎州荔子紅

福州雜詩

元
范梈

虎豹幾曾驚石鼓魚龍猶解隱金沙
遮藏翠荔餘千剝
掩映朱霞倚萬家

寄匡山人

元
陳基

早春相見又經秋秋水迢迢阻汎舟
每見玉山問消息
荔漿何日寄江樓

荔枝畫為福建僉憲張惟遠題

元
張 昱

茜羅輕裹玉肌寒，吹盡南風露未乾。
一寸丹心無與寄，為憑圖畫入長安。

題鼓山解院壁

明
方太古

十年寶劍行邊友，半夜寒燈夢裏家。
細雨短牆新佛院，小堂香滿荔枝花。

荔子曲

明
柳應芳

白玉明肌裹絳囊中含仙露壓瑤漿城南多少青絲籠
競取王家十八娘

寄阮堅之司理

明
范 汭

訟庭寂寂散春烟碧海丹山在目前市得蝦姑堪佐酒
摘來荔子不論錢

御定佩文齋詠物詩選卷三百十四

欽定四庫全書薈要卷一萬八千九百三十七 集部

御定佩文齋詠物詩選卷三百十五

龍眼類

七言律

龍眼

宋
劉子翬

幽姿傍挺綠婆娑
啄雜雖微奈美何
香割蜜脾知韻勝
價輕魚目為生多
左思賦詠名初出
玉局揄揚論豈頗
地極海南秋更暑
登盤猶足洗沈疴

龍眼

明
王象晉

來從炎燄火，瑤俎滿架芳。
馨總莫逾崖，蜜縱甘終帶酢。
江珧雖美未全瑜，騷人賦就芳名遠。
漢帝移來貝葉敷。
較側生心不忝，何緣喚作荔枝奴。

其二

何緣喚作荔枝奴，艷冶丰姿百果無。
琬液醇和羞沆瀣，金丸玊瑯賽璣珠。
好將姑射仙人產，供作瑤池王母需。
應共荔丹稱伯仲，况兼益智策勲殊。

七言絕句

龍眼

宋
張栻

荔子如今尚典型
秋林圓實著嘉名
雖無赭玉南風面
却願筠籠千里行

西園晚步

宋
楊萬里

龍眼初如菜豆肥
荔枝已似佛螺兒
南荒北客難將息
最是殘春首夏時

思明州

元
陳孚

刺竹叢叢苦筍生
山禽無數不知名
元宵已似春深後
龍眼花開蛤蚧鳴

御定佩文齋詠物詩選卷三百十五

欽定四庫全書薈要卷一萬八千九百三十八

集部

御定佩文齋詠物詩選卷三百十六

橄欖類

五言古

橄欖

宋劉敞

南珍富奇異疇昔頗窮擘夷荒無書傳從古陋鉛槧苞
封走中土天序異離坎有香已變衰有色多黯謏今君
此堂上珍物唯橄欖青膚勝瓊瑩翠顆森密苦味為幽

人貞久且君子淡甘懷彼包羞日新此剛敢清泉薦芳
茗臭味獨相感澡雪清煩醒滌除瑩元覽靈均採時菊
西伯嗜昌歆廟鼎誰調梅壯士仍嘗膽由來趨俗好諸
絕不言慘殷勤謝凡口薤白空三噉

嘗新橄欖

元
洪希文

橄欖如佳士外圓內實剛為味苦且澀其氣清以芳侑
酒解酒毒投茶助茶香得鹹即回味消食尤奇方宮商
舌底發星宿胸中藏雖云白露降氣味更老蒼山林假

歲月顏色饒風霜以茲調衆口誰敢輕頡頏作此橄欖
詩遠繼封非章大器當晚成斯言君勿忘

七言絕句

橄欖

宋
蘇軾

紛紛青子落紅鹽正味森森苦且嚴待得微甘回齒頰
已輸崖蜜十分甜

謝王子予送橄欖

宋
黃庭堅

方懷味諫軒中果忽見金盤橄欖來想共餘甘有瓜葛

苦中真味晚方回

橄欖

元
郝經

半青來子味難誇
宜著山僧點蠟茶
若是堯家金帳底
只將金橘送流霞

御定佩文齋詠物詩選卷三百十六

欽定四庫全書薈要卷一萬八千九百三十九 集部

御定佩文齋詠物詩選卷三百十七

葡萄類

七言古

初食太原生葡萄時十二月二日

宋
楊萬里

淮南葡萄八月酸只可生喫不可乾
淮北葡萄十月熟縱可作羝也無肉
老夫臘裏來都梁飮坐那得馬乳香

分明猶帶龍鬚在，徑寸玄珠肥十倍。
太原清霜熬絳錫，甘露凍作紫水精。
隆冬壓架無人摘，雪打冰封不曾折。
風吹日炙不曾腊，玉盤一朶值萬錢。
與渠傾蓋真忘年，君不見道逢麴車口流涎。

題溫日觀畫葡萄

元
楊載

老禪嗜酒醉不醒，兀坐虛檐寫清影。
興來擲筆意茫然，落葉滿庭秋月冷。
醉中捉筆兩眼花，倚檐架子欲復斜。
翠藤盤屈那可辨，但見滿紙生龍蛇。

訓蕭侯送葡萄

元虞集

蕭侯昔致葡萄苗，山童不灌三日焦。
宛西上品復親致，手種牕南自澆水。
一月當生一尺長，移向江頭薜荔牆。
秋深雨足馬乳重，舉囊石壓青霞漿。
是時蕭侯當走馬，來訪衰翁茅屋下。
酒酣舞劍傾一尊，不信金盤露如瀉。

七言律

葡萄架

宋楊萬里

纔喜盤藤卷葉生，又驚壓架暗陰成。
夏添涼潤青油幕，

秋摘甘寒黑水精近竹猶爭一尺許拋鬚先冒雨三莖
今年乞種江西去長是茅齋怯晚晴

葡萄

元 洪希文

走架龍鬚弱不支炎天待月立多時醍醐縱美輸清滑
瓔珞雖圓讓陸離珍異曾誇太冲賦纍垂已入退之詩
當年若得傳方法博取涼州亦一奇

葡萄

明 馮琦

晻暖繁陰覆綠苔藤枝羅蔓共繁迴自隨博望仙槎後

詔許甘泉別殿栽的的紫房含雨潤疎疎翠幄向風開
詞臣消渴沾新釀不羨金莖露一杯

五言絕句

題墨葡萄

元 傅若金

上苑根株少風沙道路長也知隨漢節終得薦君王
七言絕句

葡萄

唐 韓愈

新莖未徧半猶枯高架支離倦復扶若欲滿盤堆馬乳

莫辭添竹引龍鬚

觀寂照葡萄

元
鮮于樞

阿師已把書為畫
俗客那知色是空
却憶西湖酒醒處
一棚涼影卧秋風

溫日觀葡萄

元
鄧文原

滿筐圓實驪珠滑
入口甘香水玉寒
若使文園知此味
露華應不乞金盤

葡萄

元
歐陽玄

宛馬西來貢帝鄉
驪珠顆顆露凝光
只今移植江南地
蔓引龍鬚百尺長

題畫葡萄

元
丁鶴年

西域葡萄事已非
故人揮灑出天機
碧雲涼冷驪龍睡
拾得遺珠月下歸


葡萄

明
李夢陽

萬里西風過雁時
綠雲玄玉影參差
酒酣試取冰丸嚼
不說天南有荔枝



御定佩文齋詠物詩選卷三百十七



總校官庶吉士臣侍朝

校對官修撰臣張書勳

謄錄監生臣彭希韓